

# SL(5)570 – Rheoliadau Ysgolion a Gynhelir (Diwygio paragraff 7 o Atodlen 17 i Ddeddf y Coronafeirws 2020) (Cymru) 2020

## Cefndir a Diben

Mae'r Rheoliadau hyn yn diwygio paragraff 7(5) o Atodlen 17 i Ddeddf y Coronafeirws 2020 ("Deddf 2020") i ychwanegu rheoliadau 3 a 4 o Reoliadau Newid Amserau Sesiynau Ysgolion (Cymru) 2009 at y rhestr o ddeddfiadau y caiff Gweinidogion Cymru eu datgymhwyso am gyfnod a bennir yn yr hysbysiad.

Mae Rheoliadau 3 a 4 o Reoliadau Newid Amserau Sesiynau Ysgolion (Cymru) 2009 yn nodi'r weithdrefn y mae'n rhaid i awdurdod lleol neu gorff llywodraethu ysgol gymuned, ysgol a reolir yn wirfoddol neu ysgol arbennig gymunedol neu ysgol feithrin a gynhelir ei dilyn i newid amserau ei sesiynau ysgolion.

Mae'r Rheoliadau hyn hefyd yn diwygio'r tabl ym mharagraff 7(6) o Atodlen 17 i Ddeddf 2020 er mwyn ychwanegu'r gallu i addasu rhai adrannau o'r Cod Trefniadaeth Ysgolion.

Cyhoeddwyd yr hysbysiadau cysylltiedig - sef *Hysbysiad Addasu'r Cod Trefniadaeth Ysgolion (Cymru) 2020* a'r *Hysbysiad Datgymhwyso Gofynion Newid Amserau Sesiynau Ysgolion (Cymru) 2020* ar 25 Mehefin 2020 a'u cyhoeddi ar wefan Llywodraeth Cymru.

## Gweithdrefn

Gwneud Cadarnhaol: mae'r Rheoliadau eisoes wedi eu gwneud, ond mae angen i'r Senedd eu cymeradwyo er mwyn iddynt barhau mewn grym am ragor nag 28 diwrnod.

## Materion technegol: craffu

Nodwyd y pwyntiau a ganlyn i gyflwyno adroddiad arnynt o dan Reol Sefydlog 21.2 mewn perthynas â'r offeryn hwn:

### **Rheol Sefydlog 21.2 (vi) - ei bod yn ymddangos bod gwaith drafftio'r offeryn neu'r drafft yn ddiffygiol neu ei fod yn methu â bodloni gofynion statudol**

1. Mae'r pennawd gweithdrefnol yn cyfeirio at adran 94(4)(b) o Ddeddf 2020, a pharagraff 8 o Atodlen 17 iddi, sef y darpariaethau sy'n rhagnodi'r weithdrefn y mae'n rhaid i'r Rheoliadau hyn ei dilyn. Mae'r Memorandwm Esboniadol, fodd bynnag, yn darparu:

*"Gwneir y Rheoliadau hyn yn unol â'r weithdrefn a amlinellir ym mharagraff 8 o Atodlen 17 i Ddeddf 2020.*

*Fel yr amlinellir ym mharagraff 8 o Atodlen 17, gwneir y Rheoliadau heb osod drafft gerbron y Senedd a heb gymeradwyaeth y Senedd."*

Gan fod y Rheoliadau hyn yn cael eu gwneud o dan baragraff 8 o Atodlen 17 i Ddeddf 2020, mae paragraff 8(4) yn rhagnodi'r weithdrefn berthnasol i'w dilyn. Nid yw'n ymddangos bod adran 94(4)(b) yn berthnasol.

2. Mae'r rhaglith i'r Rheoliadau hyn yn dyfynnu'r pwerau galluogi fel adran 92 o Ddeddf 2020, a pharagraff 8 o Atodlen 17 iddi.



Mae paragraff 8 o Atodlen 17 i Ddeddf 2020 yn rhoi pŵer i Weinidogion Cymru wneud rheoliadau sy'n diwygio'r rhestr ym mharagraff 7(5) neu'r tabl ym mharagraff 7(6) o Ddeddf 2020 er mwyn ychwanegu deddfiad sy'n ymwneud (yn uniongyrchol neu'n anuniongyrchol) â phlant, addysg neu hyfforddiant, neu i amrywio neu ddileu cofnod.

Mae'n ymddangos nad yw adran 92 yn bŵer galluogi perthnasol at ddibenion y Rheoliadau hyn.

3. Gwnaed y Cod Trefniadaeth Ysgolion ("y Cod") gan Weinidogion Cymru o dan adrannau 38 a 39 o Ddeddf Safonau a Threfniadaeth Ysgolion (Cymru) 2013. Mae'r Rheoliadau hyn yn cynnwys cyfeiriadau sy'n dyfynnu bod y Cod wedi'i wneud o dan "adrannau 38 "[*ychwanegwyd pwyslais*] yn hytrach nag o dan "adrannau 38 a 39". Mae'r cyfeiriadau anghyflawn i'w gweld yn y lleoedd a ganlyn:

(a) Rheoliad 2(3), tudalen 4, llinell 19

(b) Rheoliad 2(3), tudalen 4, llinell 36

(c) Rheoliad 2(3), tudalen 5, llinell 5

(ch) Rheoliad 4(1), tudalen 6, llinell 4

4. Yn Rheoliad 3(3) hepgorwyd y gair "cyn" ar ôl y geiriau "heb doriad,".

5. Yn rheoliad 4(2) diffinnir "hysbysiad perthnasol" at ddibenion y rheoliad hwnnw fel hysbysiad o dan baragraff 7 o Atodlen 17 i Ddeddf 2020. Mae'r Pwyllgor yn cwestiynu a ddylai'r diffiniad gyfeirio'n benodol at baragraff 7 (6), gan fod paragraff 7(6) yn caniatáu i addasiadau gael eu gwneud i baragraffau 3.4, 3.5 neu 4.1 o'r Cod drwy hysbysiad.

Byddai cyfeirio at baragraff 7(6) yn hytrach na chyfeiriad cyffredinol at baragraff 7 yn gyson â'r dull a ddefnyddir yn rheoliadau 3(5) a 3(6), lle mae'r diffiniadau'n cyfeirio at hysbysiadau a wnaed o dan baragraff 7(5)(n) (yn hytrach na pharagraff 7) o Atodlen 17 i Ddeddf 2020.

## Rhinweddau: craffu

Nodwyd y pwynt a ganlyn i gyflwyno adroddiad arno o dan Reol Sefydlog 21.3 mewn perthynas â'r offeryn hwn:

### **Rheol Sefydlog 21.3(ii) – ei fod o bwysigrwydd gwleidyddol neu gyfreithiol neu ei fod yn codi materion polisi cyhoeddus sy'n debyg o fod o ddiddordeb i'r Senedd.**

1. Nodwn na chynhaliwyd ymgynghoriad ffurfiol mewn perthynas â'r Rheoliadau hyn. Mae'r Memorandwm Esboniadol yn nodi bod hynny yn sgîl y sefyllfa ddigynsail a grëwyd gan bandemig y Coronafeirws a'r amserlen heriol ar gyfer gwneud y Rheoliadau.

Nodir y cynhaliwyd gwaith ymgysylltu rheolaidd â'r prif gyrff cynrychioladol, fel Cymdeithas Cyfarwyddwyr Addysg Cymru (ADEW), a chynrychiolwyr awdurdodau lleol, i helpu i lywio'r cynigion polisi ynghylch y gofynion deddfwriaethol a gaiff eu haddasu neu eu datgymhwyso. Mae'r trafodaethau hyn wedi helpu i lywio'r darpariaethau sydd wedi eu cynnwys yn y Rheoliadau hyn.

Mae'r Memorandwm Esboniadol hefyd yn nodi na chwblhawyd asesiad effaith rheoleiddiol mewn perthynas â'r Rheoliadau hyn gan nad oes unrhyw gostau na buddion cysylltiedig. Nid yw'r Rheoliadau hyn ond yn ychwanegu meysydd at y rhestr o ddeddfiadau ym mharagraff 7(5) a pharagraff 7(6) o



Atodlen 17 i Ddeddf 2020 y caiff Gweinidogion Cymru wneud hysbysiadau yn eu cylch i ddatgymhwyso gofynion statudol.

O ran unrhyw hysbysiadau a wneir, mae'r Memorandwm Esboniadol yn nodi y bydd manylion am effaith y rhain mewn asesiad effaith integredig.

## Y goblygiadau yn sgîl ymadael â'r Undeb Ewropeaidd

Ni nodwyd unrhyw oblygiadau i gyflwyno adroddiad arnynt o dan Reol Sefydlog 21.3 mewn perthynas â'r offeryn hwn.

## Ymateb y Llywodraeth

**Pwynt craffu technegol 1:** Rydym yn ystyried bod adran 94(4)(b) yn gyfeiriad cywir yn y pennawd gweithdrefnol. Dyna'r weithdrefn sydd ynghlwm wrth reoliadau a wneir o dan adran 92 ac fel y'i heglurir yn yr ymateb i Bwynt craffu technegol 2, mae'n bŵer galluogi perthnasol a phriodol ar gyfer y Rheoliadau hyn.

**Pwynt craffu technegol 2:** Rydym yn ystyried bod adran 92 yn bŵer galluogi perthnasol ar gyfer y Rheoliadau hyn gan ei bod yn caniatáu i Weinidogion Cymru wneud darpariaeth i ddeddfiad gael effaith gydag addasiadau o ganlyniad i unrhyw ddarpariaeth yn y Ddeddf hon. Dyma'r sail ar gyfer y darpariaethau trosiannol a wneir yn rheoliad 3 sy'n gymwys pan fo hysbysiad wedi dod i ben. Ni fyddai paragraff 7(3) o Atodlen 17 wedi bod yn ddigonol gan na fyddai addasiadau canlyniadol a wneid o dan y ddarpariaeth honno ond yn cael effaith am y cyfnod penodedig.

**Pwynt craffu technegol 3:** Cydnabyddir bod y Cod Trefniadaeth Ysgolion ei hun yn cyfeirio ato'n cael ei wneud o dan adrannau 38 a 39 o Ddeddf Safonau a Threfniadaeth Ysgolion (Cymru) 2013. Fodd bynnag, mae adran 39 ei hun yn cyfeirio at ofynion ymgynghori a'r weithdrefn ac felly ystyrir bod y cyfeiriad yn y Rheoliadau hyn at y Cod Trefniadaeth Ysgolion a wneir o dan adran 38 yn ddigon clir, yn enwedig o ystyried y cyfeiriad at rif dogfen y Cod Statudol. Rydym yn cydnabod y dylai'r cofnodion a fewnosodir yn y tabl ym mharagraff 7 o Atodlen 17 ddarllen 'section 38' nid 'sections 38'. Felly, byddwn yn cyhoeddi slip cywiro ar gyfer hyn.

**Pwynt craffu technegol 4:** Nid ydym yn cytuno bod y gair 'before' wedi cael ei hepgor ar ôl 'without a break'. Mae digwyddiadau yn y gorffennol o reidrwydd yn ymhlyg yn y frawddeg o'i hystyried yn ei chyfanrwydd, felly nid yw'r gair 'before' yn angenrheidiol. Ni ellir dehongli'r paragraff mewn ffordd arall. Er bod y fersiwn Gymraeg yn cynnwys 'cyn' yn y ddau le nid ydym yn ystyried bod hyn yn effeithio ar y dehongliad o'r fersiwn Saesneg ac nid yw'n golygu bod angen 'before' yn y ddau le yn y fersiwn Saesneg.

**Pwynt craffu technegol 5:** Rydym yn cydnabod y gallai hyn fod wedi cael ei ddrafftio i adlewyrchu'r dull yn rheoliad 3(5) a (6). Fodd bynnag, rydym yn ystyried bod rheoliad 4(2) yn ddigon clir o ystyried bod y diffiniad o 'hysbysiad perthnasol' yn cyfeirio at hysbysiad i addasu paragraffau 3.4, 3.5 neu 4.1 o'r Cod yn y modd a ddisgrifir ym mharagraff 7(6) o Atodlen 17.



## Trafodaeth y Pwyllgor

---

Trafododd y Pwyllgor yr offeryn ac ymateb y Llywodraeth yn ei gyfarfod ar 13 Gorffennaf 2020 a chytunwyd i gyflwyno adroddiad i'r Senedd yn unol â'r pwyntiau adrodd uchod, ac i ystyried ymhellach y materion a godwyd.



Senedd Cymru

**Pwyllgor Deddfwriaeth, Cyfiawnder a'r Cyfansoddiad**

—

Welsh Parliament

**Legislation, Justice and Constitution Committee**